

Ta buska kreadó i diseñadó pa e *scout night* di Stimuleringsfonds

Fin di mart 2024 Stimuleringsfonds Creatieve Industrie (Creative Industries Fund NL) ta organisá un *scout night* pa kreadó, diseñadó i arkitekto ku ke profundisá i profesionalisá nan práktika. Kuratòr i produktor di programa Ana Maria Hernandez a wòrdu apuntá komo *scout* di talento pa Aruba, Boneiru, Kòrsou, Sint-Maarten, Sint-Eustatius i Saba. Por registrá te ku dia 17 di febrüari 2024 pa partisipá.

E asina yamá *scout night* ta pa esnan ku ta diseñá òf krea i desaroyá produkto kultural/artístiko, anto ku ke traha un aña largu na lanta i desaroyá nan práktika artístiko di manera independiente. Ta trata di por ehèmpel diseñadó di moda, artista ku ta pinta animashon i dibuho di kòmeks, *artdirectors*, artista di media i artista ku ta usa medionan digital òf otro empresario kreativo. Empresario kreativo ku por ehèmpel ke traha ku temanan rondó di klima, kuminda, patrimonio òf historianan ku ta haña muchu tiki atenshon.

Durante e *scout night* dies kreadó kresiente ta presentá nan plannan pa medio di un *pitch* na e hurado di profeshonalnan den mundu di arte i diseño. Entre esnan ku ta tene nan *pitch* e hurado ta selekshoná kuater kreadó ku lo risibí mil euro di Stimuleringsfonds, pa por traha un plan di desaroyo. Kaba nan ta risibí un beka di 25 mil euro pa realmente por ehekutá nan plan.

Seshonnan di orientashon na Aruba, Kòrsou i Sint-Maarten

Fin di yanüari i kuminsamentu di febrüari Hernandez lo organisá tres seshon di orientashon na Aruba, Kòrsou i Sint-Maarten. Durante esakinan lo duna mas informashon tokante e proseso di registrashon.

E promé seshon di orientashon lo tuma lugá na Aruba. Esaki lo tuma lugá riba djasabra 27 di yanüari 10 or na Studio Six Media. E di dos seshon lo ta na Sint Maarten riba djaweps promé di febrüari 5 or di atardi. E último seshon lo ta na Kòrsou, na Piso Sero i lo tuma lugá riba djasabra 3 di febrüari 3 or di atardi.

Stimuleringsfonds Creatieve Industrie

Stimuleringsfonds Creatieve Industrie (Creative Industries Fund NL) ta un fondo kultural di estado hulandes pa diseño, arkitektura i kombinashonnan entre esakinan. E fondo ta finansia proyekto spesial i inovativo, investigashon i aktividatnan di diseñadónan, produktornan i institutonan kultural den e industria kreativo na Hulanda i den e parti karibense di Rèino hulandes. Organisando un *scout night* den e parti karibense di Rèino e organisashon ke duna mas popularidat na Stimuleringsfonds Creatieve Industrie i loke e tin di ofresé.

Mas informashon

Por haña mas informashon tokante e *scout night* akí na wèpsait di Stimuleringsfonds: <https://www.stimuleringsfonds.nl/en/news/scout-ana-maria-hernandez-starts-in-the-caribbean-part-of-the-kingdom>

Si tin pregunta por tuma kontakto ku Ana Maria Hernandez pa medio di ABCSSS@stimuleringsfonds.nl